

四庫全書

子部

欽定四庫全書

冊府元龜卷三百五十三 宋 王欽若等 撰

將帥部

立功第六

後魏長孫道生太武即位初以南統將軍汝陰公從征蠕蠕與尉眷等率衆出白黑兩漠間大捷而還太武征赫連昌道生以廷尉與司徒長孫翰宗正娥清為前驅遂平其國

長孫翰為司徒襲赫連昌破之太武復征昌翰與廷尉道生宗正娥清率騎三萬為前驅昌戰敗奔上邽翰以八千騎追之至高平不及而還從襲蠕蠕車駕渡漠大檀奔走其弟匹黎率眾赴之遇翰交戰匹黎潰走斬其渠帥數百人

王度為衛尉卿從太武征赫連昌討蠕蠕並有功賜爵濟陽公加散騎常侍平南將軍詔度率五千騎與叔孫連合擊宋兖州刺史竺靈秀於湖陸大破之

奚眷為鎮南將軍鎮長安太武幸美稷眷受詔督諸軍
事共討山胡白龍于西河破之屠其城斬首數千級虜
其妻子而還太武平姑臧遣眷討沮渠臧孫牧捷弟私
署張掖太守宜得宜得奔酒泉酒泉太守無諱與宜得
奔高昌獲其二城後沮渠天周復據酒泉眷討平之虜
男女四千餘人

尉眷為安北將軍出鎮北境與平陽王長孫翰擊蠕蠕
別帥阿伏干於柞山率師至歌刪山擊蠕蠕別帥便度

弟庫仁直引師而北蠕蠕部帥莫孤帥高車騎五千來
逆眷擊破之斬首千餘級又從征蠕蠕眷出白黑兩漠
之間擊其東部大獲而還又從征赫連昌眷出道南擊
昌於上邽士衆乏糧臨淮公丘堆等租於郡縣為昌所
敗昌乘勝抄掠諸將患之眷與侍御史安頡陰謀設伏
邀擊擒昌以功拜寧北將軍加散騎常侍進爵源陽公
後從征和龍眷督萬騎前驅降二千餘戶尋為假節加
侍中都督豫雒二州及河內諸軍事安南諸軍開府鎮

虎牢張掖王禿髮保周之反也徵眷與永昌王健等率
衆討之破保周於蕃禾周遁走眷率騎追之保周窮迫
自殺詔眷留鎮涼州加都督涼沙二州諸軍事安西將
軍領護羌戎校尉轉燉煌鎮將又擊破吐谷渾俘三千
餘口眷歷鎮四藩威名並著文成時北擊伊吾尅其城
大獲而還尋拜侍中太尉進爵為王

薛謹為平西將軍秦州刺史時山胡白龍憑險作逆太
武詔鎮南將軍奚眷與謹自太平北入討平之除安西

將軍梧陵公

羅斤為侍御中散從太武討赫連昌帝追奔入城昌邀擊左右多死斤力戰有功帝嘉之錄勲除散騎常侍後為平西將軍平涼州攻城野戰多有克捷以功賜爵帶方公

司徒楚之為安南大將軍屯潁川宋將到彥之沂河而西列守南岸至於衛關及彥之等退走楚之破其別軍於長社又與冠軍將軍安頡攻滑臺拔之擒宋將朱循

之季元德及東郡太守申謨俘萬餘人從征涼州以功
賜隸戶一百

張黎為鎮北將軍鎮長安太武詔黎鎮兵一萬二千人
通莎泉道帝征涼州蠕蠕吳提乘虛入寇黎與司空道
生拒擊走之

來大千為征北大將軍從太武討蠕蠕戰功居多遷征
北大將軍賜爵盧陵公鎮雲中兼統北道軍事賊北叛
大千前後追擊莫不平殄延和初北伐大千為前鋒大

破虜軍

陸真為內三郎數從太武征伐所在有功宋將王玄謨
衆數萬人寇滑臺寔從帝討之夜與數人乘小船突玄
謨軍入城撫慰登城巡行賊營中乃還渡河至明玄謨
敗走從駕至江真再破賊軍拜建武將軍石城子還攻
盱眙真功多遷給事中

奚烏侯為治書御史建義將軍從征蠕蠕擊赫連昌以
功進爵城陽公加負外散騎常侍陸陵侯為武牢鎮大

將平涼休屠金崖羌狄子玉等叛以侯為平西將軍追討崖等皆獲之

韓茂為虎賁中郎將從太武征赫連昌大破之帝謂諸將曰今若窮兵極武非弔伐之道明矣當共卿等取之徙其民而還以軍功賜茂爵蒲陰子加強弩將軍遷侍輦郎又從征統萬大破之從平涼當茂所衝莫不應弦而殪繇是帝壯之拜內侍長進爵九門侯從征蠕蠕頻戰大捷與樂平王丕等伐和龍徙其居民從征涼州茂

為前鋒都將戰功居多遷司衛監錄前後功拜散騎常侍殿中尚書進爵安定公從破薛永宗蓋吳轉都官尚書從征懸瓠頻破賊軍車駕南征分為六道茂與高涼王那出青州諸軍渡淮降者相繼拜茂徐州刺史以撫之

長孫陳為羽林郎征和龍賊自西門出將犯外圍陳擊退之追斬至其城下以功賜爵五等男

屈垣為中領軍督諸軍東伐進號鎮東大將軍師次和

龍馮文通致牛酒以犒軍獻甲三千垣責其不送侍子數之以王命遂掠男女六千口而還

封勅文為鎮西將軍護西羌校尉詔勅文率步騎七千征吐谷渾莫利延兄子拾歸於抱罕衆少不能制詔遣安遠將軍廣川公乙烏頭等二軍與勅文會隴右軍次武始拾歸夜遁勅文引軍入抱罕虜拾歸妻子及其民戶分徙千家於上邽

皮豹子為選部尚書淮陽公宋遣將裴方明等侵南秦

王楊難當遂陷仇池太武徵豹子拜仇池鎮將督關中諸軍與古弼等分命諸將十道並進豹子進擊樂鄉大破之擒宋將王奐之長卿等六人斬首三千餘級俘獲二千人豹子進軍下辨宋將強玄明辛伯奮棄城遁走追斬之悉獲其衆宋使其秦州刺史胡崇之鎮仇池至漢中聞官軍已西懼不敢進玄明益其兵而遣之豹子與司馬楚之至於濁水擊擒崇之盡虜其衆宋將姜道祖降仇池平未幾諸氏復反推揚文德為主宋復遣揚

文德姜道盛率衆二萬人寇濁水別遣將青陽顯伯守斧山以距豹子濁水城兵射殺道盛豹子至斧山斬顯伯悉俘其衆豹子又與河間公元齊俱會于濁水賊衆震恐棄其兵甲夜遁初南秦王楊難當歸命詔送楊氏子弟詣京師文德以行賂得留亡奔漢中宋以文德為武都王給兵二千人守葭蘆招誘氏羌於是武都陰平五部氏民叛應文德詔豹子率諸軍討之文德阻兵固險以距豹子文德將楊高來降引諸軍向其城文德棄城

南走收其妻子寮屬軍資及故武都王保宗妻公主送
京師宋白水太守郭啟玄率衆救文德豹子分軍逆擊
大破之啟玄文德走還漢中豹子尋為內都大官宋遣
其將殷孝祖修兩當城於清東以逼南境天水公封勅
文擊之不克詔豹子助之豹子以南寇城守攻圍費日遂畧
地至高平宋瑕丘鎮遣步卒五千助戍兩當去城八里與
豹子前鋒候騎相遇即便交戰豹子軍繼至大破之縱
騎追擊殺之至於城下其免者十餘人而已城內恐懼

不敢出救既而班師

古弼為安西將軍鎮長安時宋遣將裴方明等擊南秦
王楊難當遣使請救兵未至難當奔上邽方明尅仇池
立楊玄庶子保熾於是假弼都督隴右諸軍宋遣其秦
州刺史胡崇之屯仇池弼與平西將軍元齊邀崇之於
濁水臨陣擒之其衆走還漢中弼等從祥郊山南入與
東道將皮豹子等討仇池遣永安侯賀純攻宋塞狹道
守將姜道祖退守狹亭諸將以山道險峻時又雪深用

馬不便皆遲留不進弼獨進軍元齊賀純等擊狹亭道
祖南走仇池平

尉撥文成時為太學生募從羅忸擊賊於陳汝有功賜
爵介休男從討和龍遷虎賁帥轉千人軍將又從樂平
王丕討和龍除為涼州軍將擊吐谷渾獲其人一千餘
落後吐谷渾小將率三百餘落來降尋復亡叛撥率騎
追之盡獲而還以功進爵為子獻文即位為北征都將
南攻懸瓠破宋將朱湛之水軍三千人拜懸瓠鎮將

陸真為選部尚書時丁零數千家竊寇并定真與并州
刺史乞伏成龍自樂平東入與定州刺史許崇之併力
討滅尋遷安西將軍長安鎮將假建平公胡賊帥賀畧
孫聚眾千餘人叛于石樓真擊破之殺五百餘人是時
初置長蛇鎮真率眾築城未訖而氐豪仇儻檀等反叛
氏民咸應其眾甚盛真擊平之殺四千餘人卒城長蛇
而還

薛拔為都將與陸真討反仇儻檀強免生平之

房拔為北鎮將興光元年擊蠕蠕虜其將豆渾與句等
獲馬千餘匹

于洛拔為外都大官會隴西屠各王景文等恃險竊命
私署王侯文成詔洛拔與南陽王惠壽督四州之衆討
平之徙其惡黨三千餘家於趙魏轉拜侍即殿中尚書
源賀為太尉時蠕蠕寇邊賀從文成追討破之及孝文
即位時河西勅勒叛遣賀率衆討之降二千餘落倍道
兼行追賊黨郁朱千等至抱罕大破之斬首五千餘級

虜男女萬餘口雜畜三萬餘頭復追統萬高平上邽三鎮叛勅勒至千金城斬首三千級

尉元為鎮南大將軍獻文天安元年宋將薛安都以徐州內附元與孔伯恭赴援宋遣將張永沈攸之等率衆討安都屯于下碭永乃分遣羽林監王穆之領卒五千守輜重於武原龍驤將軍謝善居領卒二千據呂梁散騎侍郎張弘領卒二千守茱萸督上租糧供其軍實安都出城見元元依朝旨授其徐州刺史遣中書侍郎高

問李璠等與安都俱還入城別令孔伯恭精甲二千撫安內外然後元入彭城元以張永仍據險要攻守勢倍懼傷士卒乃命安都與璠等固守身率精銳揚兵於外分擊呂梁絕其糧運善居遁奔茱萸仍與張弘東走武原馳騎追擊斬首八百餘級武原窮寇八千餘人拒戰不下元親擐甲胄四面攻之破其外營殺傷大半獲其輜重五百餘乘以給彭城諸軍然後收師緩戰開其走路穆之率餘燼奔于永軍永勢挫力屈元乘勝圍之攻

其南門永遂捐城夜遁伯恭安都乘勝追擊時大雨雪
泗水冰合永棄船而走元豫策永必將東亡身率衆軍
邀其走路南北奮擊大破於呂梁之東斬首數萬級追
北六十餘里死者相枕手足凍斷者十八九生擒宋都
督梁南北秦三州諸軍事寧朔將軍垣恭祖羽林監沈
承伯等永攸之輕騎走免收其船車軍資器械不可勝
數

呂洛拔為平原鎮都將宋徐州刺史薛安都歸誠請援

詔遣尉元率衆救之洛拔隨元入彭城宋將張永遣將
王茂之領兵五千入武原援其運車元遣洛拔率騎詣
武原擊之格戰二日手殺九人奪賊運車二百餘乘牛
二百五十頭仍共擊永大敗之賜爵成武侯加建義將
軍

孔伯恭為散騎常侍宋徐州刺史薛安都以彭城內附
宋遣張永沈攸之等擊安都獻文遣伯恭副尉元救之
永等引師而退時皇興元年正月天大寒雪泗水冰合

永與攸之棄船而走伯恭以書喻下邳宿豫城內時攸
之吳禧公等率衆數萬來援下邳屯軍焦墟曲去下邳
五十餘里伯恭遣子都將侯汾等率騎五百在水南奚
升等五百餘騎在水北南北邀之伯恭密造火車攻具
欲水陸俱進攸之等既聞將戰引軍退保樊階城伯恭
又令子都將孫天慶等步騎六千向零中峽斫木斷清水
路宋寧朔將軍陳顯達領衆二千溯清而上以迎之屯于
睢清合口伯恭率衆渡水大破顯達軍俘斬十九攸之聞顯

達軍敗順流退下伯恭從睢陵城東向零中峽分軍
為二道遣司馬范師子等在清南伯恭從清西與攸之
合戰遂大破之斬其將姜產之高遵世及邱幼弼邱隆
先沈誕沈榮宗陸道景等首攸之禧公等輕騎遁走乘
勝追奔八十餘里資糧器械虜獲萬計進攻宿豫宋戍
將魯僧遵棄城夜遁又遣將孔太恒等領募騎一千南
討淮陽二年以伯恭都督徐南北兗州諸軍彭城鎮將
尉多侯孝文時為假節征西將軍領護羌戎校尉延興

初蠕蠕遣部帥无盧真率三萬騎入塞圍鎮多侯擊走之
以功進號征西大將軍後多侯獵于南山蠕蠕遣部帥
度拔入圍燉煌斷其還路多侯且前且戰遂衝圍而入率衆
出戰大破之追北數十里斬首千餘級

皮喜為南部尚書太和元年宋葭蘆戍主楊文度遣弟
鼠竊據仇池詔喜率衆四萬討鼠軍到建安鼠棄城南
走進次濁水遣平西將軍楊靈珍擊文度所置仇池太
守楊真真衆潰僅而得免喜遂軍於覆津文度將強大

黑固守津道懸崖險絕偏閣單行喜部分將士攀崖涉
水衝擊大黑大黑潰走追奔西入攻葭蘆城拔之斬文
度傳首京師殺一千餘人

韋珍為樂陵鎮將齊司州民謝天蓋自署司州刺史規
欲以內附事泄為齊將崔慧景攻圍詔珍率在鎮士馬
渡淮援接時齊聞珍將至遣將苟元賓據淮逆拒珍乃
分遣鐵騎於上流潛渡親率步士與賊對壘旗鼓始交
鐵騎掩至腹背奮擊破之天蓋尋為左右所殺降於慧

景珍乘勝馳進又破慧景擁降民七千餘戶內徙表置
城陽三郡以處之

李崇為河南尹孝文南討漢陽以崇行梁州刺史氏楊
靈珍遣弟婆羅與子雙領步騎萬餘襲破武興與齊相
結詔崇為使持節都督隴右諸軍事率眾數萬討之崇
槎山分進出其不意表裏攻襲群氏皆棄靈珍散歸靈
珍眾減大半崇進據赤土靈珍又遣從弟建率五千人
屯龍門躬率精勇一萬據鷲峽龍門之北數十里中伐

樹塞路驚破之口積大木聚礮石臨崖之下以拒官軍
崇乃命統軍慕容拒率衆五千從他路夜襲龍門破之
崇乃自攻靈珍靈珍連戰敗走俘其妻子崇多設疑兵
襲克武興齊梁州刺史陰廣宗遣參軍鄭猷王思考率
衆援靈珍崇大破之并斬婆羅首殺千餘人俘獲猷等
珍走奔漢中以崇為都督梁秦二州諸軍事及靈珍偷
據白水崇擊破之靈珍遠遁孝明初徵為右衛將軍轉
左衛將軍相州大中正魯陽蠻柳北喜魯北鷲等聚衆

反叛諸蠻悉應之圍逼湖陽游擊將軍李暉先鎮此城
盡力捍禦賊勢甚盛詔以崇為使持節都督征蠻諸軍
事以討之蠻衆數萬屯據形要以拒官軍崇累戰破之
斬北鵞等徙萬餘戶於幽并諸州孝明追賞平氏之功
封魏昌縣開國伯邑五百戶東荆蠻樊安聚衆於龍山
僭稱大號梁武共為唇齒遣兵應之諸將討擊不利乃
以崇為使持節散騎常侍都督征蠻將軍事進號鎮南
將軍率步騎以討之崇分遣諸將攻擊賊壘連戰尅捷

生擒樊安進討西荆諸蠻悉降延昌初加侍中車騎將軍都督江西諸軍事時梁武遣其游擊將軍趙祖悅襲據西硤石更築外城逼徙汭淮之人於城內又遣二將昌義之王神念率水軍沂淮而上規取壽春田道龍寇邊城路長平寇五門胡興茂寇開霍揚州諸城皆被寇逼崇分遣諸將與之相持密裝船艦二百餘艘教之水戰以待臺軍梁武霍州司馬田休等率衆寇建安崇遣統軍李神擊走之又命邊城戍主邵申賢要其走路破

之於濡水俘斬三千餘人靈太后璽書勞勉許昌縣令
兼紆麻戍主陳平王南引梁軍以戍歸之崇自秋請援
表至十餘詔遣鎮南將軍崔亮救硤石鎮東將軍蕭寶
寅於梁人堰上流決淮東注朝廷以諸將乖角不相赴
乃以尚書李平兼右僕射持節節度之崇遣李神乘關
艦百餘艘沿淮與李平崔亮合攻硤石李神水軍赴其
東北外城祖悅力屈乃降朝廷嘉之進號驃騎將軍儀
同三司刺史都督如故

王肅為輔國將軍長史詔討南齊義陽肅至義陽頻破賊軍降者萬餘孝文遣散騎侍郎勞之以功進號平南將軍賜駿馬一匹宣武初為尚書令時南齊裴叔業以壽春內附拜肅使持節都督江西諸軍事車騎將軍與驃騎大將軍彭城王勰率步騎十萬以赴之齊豫州刺史蕭懿率衆三萬屯於小岷交州刺史李叔獻屯合肥將圍壽春懿遣將胡松李居士等領衆萬餘屯據死虎肅進師討擊大破之擒其將喬岷等斬首數千進討合

肥生擒叔獻蕭懿棄小岷南走肅還京師帝以肅淮南
累捷賞帛四千七百五十匹進位開府儀同三司封昌
國縣開國侯

奚康生為中堅將軍西臺直後吐京胡反自號辛支王
康生為軍主從章武王彬討之胡遣精騎一千邀谷斷
截康生率五百人拒戰破之追至石羊城斬首三十級
彬甲卒七千與胡賊戰分為五軍四軍俱敗康生軍獨
全遷為統軍時壽春來降詔康生宣撫俄而齊將桓和

屯軍梁城陳伯之據硤石民心駭動頗有異謀康生乃防禦內外音信不通固城一月援軍乃至康生出擊桓和伯之等二軍並破走之拔梁城合肥洛口三戍以功遷征虜將軍封安戎縣開國男食邑二百戶及梁將宋黑率眾寇擾彭城時康生遭母憂詔起為別將持節假平南將軍領南青州諸軍擊走之後梁復遣都督臨川王蕭密副將張惠紹勒甲十萬規寇徐州又假宋黑徐州刺史領眾二萬水陸俱進徑圍高塚戍詔授康生武

衛將軍持節假平南將軍為別將領羽林三千人騎步
甲士隨便割配康生戰破走之

長孫百年為抱竿領將太和中攻吐谷渾所置洮陽泥
和二戍克之獲三千餘人

僧淵為黃郭戍主太和末齊將王曇紛等萬餘人寇南
青州僧淵擊破之悉虜其衆

陸叡為北征都督擊蠕蠕大破之遷侍中都曹尚書時
蠕蠕又犯塞詔叡率騎五千以討之蠕蠕遁走追至石

磧擒其帥赤阿突等數百人而還加散騎常侍遷尚書
左僕射領北部尚書又為使持節鎮北大將軍與楊平
王蹟並為都督領軍將軍斛律桓等北征三道諸軍事
步騎十萬以討蠕蠕虜以下各賜衣物布帛孝文親幸
城北訓誓群帥除尚書令衛將軍虜大破蠕蠕而還
穆亮為都督秦梁益三州諸軍事征南大將軍領護西
戎校尉仇池鎮將時宕昌王梁彌機死子彌博立為吐
谷渾所逼來奔仇池亮以彌機蕃款素著矜其亡滅彌

博凶悖氏羗所棄彌機兄子彌承戎民歸樂表請納之
孝文從焉於是率騎三萬次于龍鵠擊走吐谷渾立彌
承而還

楊播為龍驤將軍與楊平王蹟等出漢北擊蠕蠕大獲
而還孝文嘉其勲賜奴婢十餘口遷武衛將軍復擊蠕
蠕至居延山而還除左衛將軍後為右衛將軍從駕討
崔慧景於鄧城破之進號平東將軍

劉思祖孝文朝屢為統軍南征累著功捷宣武初為平

遠將軍任城王之圍鍾離也梁遣其冠軍將軍張惠紹及彭蒼與張豹子等率衆二萬送糧鍾離思祖領兵數千邀梁餉軍於邵陽遣其長史元龜步騎一千於鍾離之北遏其前鋒錄事叅軍繆琰掩其後思祖身率精銳橫衝其陣三軍合擊大破之擒惠紹及梁驍騎將軍祁陽縣開國男趙景悅之弟寧遠將軍景循寧遠將軍梅世和屯騎校尉任景攸長水校尉邊欣越騎校尉賈慶真龍驤將軍徐州敞等俘斬數千人

趙遐宣武景明初為梁城戍主被梁將攻圍以固守及
戰功封牟平子後以左將軍督巴東諸軍事鎮南鄭時
梁冠軍將軍軍主姜脩衆二萬屯羊口輔國將軍姜白
龍據南城龍驤將軍泉建率土民北入桑垣姜脩又分軍
據興勢司州刺史王僧炳頓南安並扇動夷獠規翻南
鄭遐率甲卒所在衝擊數百里間莫不摧靡前後斬首
五千餘級還

司馬悅為鎮遠將軍豫州刺史悅與鎮南將軍元英攻

義陽尅之詔改梁司州為郢州以悅為征虜將軍郢州
刺史梁遣其豫州刺史馬仙琕左軍將軍永陽戍主陳
可等率衆一萬於三關南六十里因山起城名為竹敦
遣其輔國將軍濟陰太守薊沛精兵二千以戍之後於
關南四十里麻陽舊柵起城仙琕輕騎東西為之節度
關南之民多懷兩望悅令西關統軍諸靈鳳掩擊敗之
盡燔其城樓儲積擒薊沛及其輔國將軍軍主劉靈秀
以散騎常侍徵還從征涼州以功賜隸戶一百

傅豎眼為建武將軍鎮合肥武興氏楊集義反叛推其
兄子紹先為主攻圍闕城梁州刺史邢巒遣豎眼討之
集義眾逆戰頻破走之乘勝追北乃尅武興後為昭武
將軍益州刺史以州初置境逼巴獠給羽林虎賁三百
人進號冠軍將軍及高肇伐蜀假豎眼征虜將軍持節
領步兵三萬先討北巴梁高祖聞大軍西伐遣其寧州
刺史任太洪從陰平偷路入益州北境欲擾動氏蜀以
絕運路乘國諱班師遂扇誘土民奄破東洛除口二戍因

此詐言南軍繼至氏蜀信之翕然從逆太洪率氏蜀數千圍逼關城豎眼遣寧朔將軍成興孫討之軍次白護太洪遣其輔國將軍任碩北等率衆一千邀險拒戰在虎徑南山連置三營興孫分遣諸統隨便掩擊皆破之太洪又遣軍主邊昭等率氏蜀三千攻逼興孫柵興孫力戰為流矢所中死豎眼又遣統軍姜喜季元度從東嶼潛入迴出西崗邀賊之後表裏合擊大破之斬邊昭及太洪前部王隆護首於是太洪及關城五柵一時逃

散及孝明時屢請解州乃以元法僧代之至洛拜征虜將軍大中大夫梁遣將趙祖悅入屯硤口以逼壽春鎮南將軍崔亮討之以豎眼為持節鎮南軍司法僧既至大失民和梁遣其信武將軍衡州刺史張齊因民心怨入寇晉壽頻陷葭萌小劔諸戍進圍州城朝廷以西南為憂乃驛徵豎眼於淮南既至以為右將軍益州刺史尋加散騎常侍平西將軍假安西將軍西征都督率騎三千以討張齊給銅印千餘須有假職者聽六品以下

板之豎眼既出梁州梁冠軍將軍勾道侍梁州刺史王太
洪等十餘將所在拒塞豎眼三日之中轉戰二百餘里
甲不去身頻致九捷土民統軍席廣度等處處邀擊斬
太洪及梁征虜將軍楊伏錫等首張齊引兵西退遂奔
葭萌蜀民間豎眼復為刺史人人喜悅迎於路者日有
百數豎眼至州白水以東民皆寧業先是梁信義將軍
都統白水諸軍事楊興起征虜將軍李光宗襲據白水
舊城豎眼遣虎威將軍強虬與陰平王楊大赤率衆千

餘夜渡白水旦而交戰大敗賊軍斬興起首剋復舊城又遣
統軍傅曇表等大破梁寧朔將軍王光昭於陰平張齊
仍阻白水屯寇葭萌豎眼分遣諸將水陸討之齊遣其
寧朔將軍費忻督步騎二千逆來拒戰軍主陳洪起力
戰破之乘勝追奔遂臨夾谷三柵統軍胡小虎四面攻
之三柵俱潰張齊親率驍勇二萬餘人與諸軍交戰豎
眼命諸統帥同時奮擊軍主許暢斬梁雄信將軍牟興
祖軍主孔領周射齊中足於是大破賊軍斬獲甚衆齊

乃柵於虎頭山下賊帥任令崇屯據西郡豎眼復遣討之令崇棄衆夜遁乃進討齊破其三柵斬首萬餘齊被重創奔竄而退小劔大劔賊亦捐城西走益州平

田益宗為征虜將軍宣武景明初梁遣軍主吳子陽率衆寇三關益宗遣光城太守梅與之步騎四千進至陰山關南八十餘里據長風城逆擊子陽大破之斬獲千餘級梁建寧太守黃天賜築城赤亭復遣其黃公賞屯於滌城與風相持益宗命安蠻太守梅景秀為之犄角擊討

破天賜等斬首數百獲其二城後梁寧朔將軍楊僧遠率衆二千寇逼蒙籠益宗命魯生與戍主奇道顯逆擊破之追奔十里俘斬千餘進號平南將軍

楊大眼為征虜將軍東荊州刺史景明中蠻酋樊秀安等反詔大眼為別將隸都督李崇討平之後遷平南將軍持節都統軍正始中梁遣其前江州刺史王茂先率衆數萬次于樊雍招誘蠻夏規立宛州又令其所署宛州刺史雷豹狼軍主曹仲宗等領衆二萬偷據河南城

宣武以大眼為武衛將軍假平南將軍持節都督統軍曹敬邴虬樊魯等諸軍討茂先等大破之斬梁輔國將軍王花龍驤將軍申天化俘馘七千有餘梁又遣其勇將張惠紹總率眾軍竊據宿豫又假大眼平東將軍為別將與都督邢巒討破之

薛真度景明中為平南將軍時梁豫州刺史王超宗率眾圍逼小岨真度遣兼統軍李叔仁等率步騎擊之超宗逆來拒戰叔仁擊破之俘斬三千還朝除金紫光祿

大夫加散騎常侍

魏承祖為右將軍善撫士卒兼有將材自宣武景明以後嘗為統軍南北征伐累有戰功歷太原太守至光祿大夫

陳伯之為冠軍將軍正始初梁征虜將軍趙祖悅築城於水東與潁川接對置兵數千欲為攻討之計伯之進軍討祖悅大破之乘勝長驅入城刺祖悅三創賊眾大敗進討破諸郡賊斬獲數千

刁整為尚書左中兵郎中正始中梁江州刺史王茂先來寇南境平南將軍楊大眼討之詔整持節為大眼軍司大破茂先斬梁輔國將軍王花等永平初以軍功除負外散騎常侍

畢祖朽為寧遠將軍正始中梁將蕭及先率步騎二萬人寇兗州及先令別帥角念屯于蒙山以祖朽為統軍假寧朔將軍隸邢巒討之祖朽開誘有方降者相繼賊出逆戰祖朽大破之賊走還柵祖朽夜又焚擊賊徒潰

散追討百餘里斬獲及赴沂死者四千餘人斬龍驤將
軍矯道儀寧朔將軍王秀以功封南城縣開國男食邑
二百戶

李世哲為三關別將延昌三年大破羣蠻斬梁龍驤將
軍文思之文天生

李煥為輔國將軍梁州刺史時武興氏楊集起舉兵作
逆令弟集義邀斷白馬戍勅假煥平西將軍督別將石
長樂統軍王祐等與軍司苟金養俱討之大破集起軍

會秦州民呂苟兒反煥仍令長樂等繇麥積崖赴援屬都督元麗至遂共平之時氏王楊定進猶據方山與苟兒影響煥密募氏趙芸路斬定

邢巒為尚書時梁朝梁秦二州行事夏侯道遷以漢中內附詔加巒使持節都督征梁漢諸軍事假鎮西將軍進退徵攝得以便宜從事巒至漢中白馬以西猶未歸順巒遣寧遠將軍楊舉統軍楊衆愛汜洪稚等領卒六千討之軍鋒所臨賊皆款附唯補谷戍主何法靜據城

拒守舉等進師討之法靜奔潰乘勝追至關城之下梁龍驤將軍關城流雜李侍叔逆以城降梁輔國將軍任僧幼等三十餘將率南安廣長東洛大寒武始除口平溪桶谷諸郡之民七千餘戶相繼而至梁平西將軍李天賜晉壽太守王景胤等擁衆七千屯據石亭統軍韓多寶等率衆擊之破天賜前將軍趙睹擒斬一千三百遣統軍李義珍討晉壽景胤宵遁遂平之拜巒使持節安西將軍梁秦二州刺史梁巴西太守龐景民恃遠不降

巒遣巴州刺史嚴玄思往攻之斬景民巴西悉平梁遣其冠軍將軍孔陵等率衆二萬屯據深坑冠軍將軍魯方達固安南冠軍任僧褒輔國將軍李畎戍石同巒統軍王足所在擊破之梟梁輔國將軍樂保明寧朔將軍李伯度龍驤將軍李思賢賊遂保回車柵足又進擊梁輔國將軍范峻自餘斬獲殆將萬數孔陵等收集遺衆奔保梓潼足又破之斬梁輔國將軍符伯度其殺傷投溺者萬有餘人開地定民東西七百南北千里獲郡十

四二部護軍及諸縣戍後為安東將軍先是梁輔國將軍蕭及先率衆二萬寇陷固城冠軍將軍魯顯文驍騎將軍相文玉等率衆一萬屯於孤山梁將角念等率衆一萬擾亂寇蒙土民從逆十室而五巒遣統軍樊魯討文玉別將元恒攻固城統軍畢祖朽討角念樊魯大破文玉等追奔八十餘里斬首四千餘級元恒又破固城畢祖朽復破念等兗州悉平巒破賊將藍懷恭於睢口進圍宿豫而懷恭等復清南造城規斷水陸之路巒身

率諸軍自水南而進遣平南將軍楊大眼從水北逼之
統軍劉思祖等夾水造筏燒其船舫衆軍齊進拔柵填
塹直登其城火起中流四面俱擊乃陷賊城俘斬數萬
在陣別斬懷恭擒其列侯列將直閣直後三十餘人俘
斬一萬宿豫既平蕭昞亦於睢陽退走二戍獲米四十
餘萬石後豫州城民白早生殺刺史司馬悅以城南入
詔巒持節討之巒率騎八百倍道兼行五日次於鮑口
賊遣大將軍胡孝智率衆七千去城二百逆來拒戰巒

擊破孝智乘勝長驅至於懸瓠賊出城逆戰又大破之
因即渡汝既而大兵繼至遂長圍之詔加巒使持節假
鎮南將軍都督南討諸軍事征南將軍中山王英南討
三關亦次於懸瓠以後軍未至前寇稍多憚不敢進乃
與巒分兵犄角攻之梁將齊苟仁等二十一人開門出降
即斬早生等同惡數十人豫州平

裴良以尚書左丞為西北道行臺討汾州羣胡薛羽等
值別將李德龍為羽所破良入汾州與刺史汝陰王景

和及德龍率兵數千人憑城自守賊併力攻逼詔遣行臺裴延儁大都督章武王融都督宗王彌孫等赴援時有五城郡山胡馮宜都賀悅迴成等以妖妄惑衆假稱帝號服素衣持白傘白幡率諸逆衆於雲臺郊抗拒王師融等與戰敗績賊乘勝圍城良率將士出戰大破之於陣斬迴成

李平為鎮北將軍討京兆王愉於冀州平至城南十六里賊攻圍濟州軍拔柵填塹未滿者數尺諸將合戰無

利而還憚於更進平親入行間勸以重賞士卒乃前大
破逆衆愉時墜馬乃有一人下馬援愉上而鬪死乘勝
逐北至於城門斬首數萬級遂圍城燒門愉與百餘騎
突門出走遣統軍叔孫頭追之去信都八十里擒愉冀
州平後遷鎮軍大將軍率步騎二千以赴壽春平巡視
碣石內外知其盈虛之所嚴勅崇亮令水陸兼備尅期
齊舉崇亮憚之無敢乖互頻日交戰屢破賊軍安南將
崔延伯立橋於下蔡以拒賊之援軍賊將王神念昌義

之等不得進救趙祖悅守死窮城平乃分部攻之令崔亮督陸卒攻其城西李崇勒水軍擊其東面然後鼓噪南北俱上賊衆周章東西赴戰屠賊外城賊之將士相率歸附祖悅率其餘衆固保南城通夜攻守至明乃降斬祖悅送首於洛俘獲甚衆

冊府元龜卷三百五十三

欽定四庫全書

子部

冊府元龜卷三百五十七至

詳校官中書臣羅錦森

侍讀臣孫球覆勘

總校官庶吉士臣何思鈞

校對官助教臣蔡鎮

謄錄監生臣張仲芳

欽定四庫全書

冊府元龜卷三百五十四

宋 王欽若等 撰

將帥部

立功第七

後魏崔亮孝明初為撫軍將軍定州刺史梁左游擊將
軍趙祖悅率眾偷據硤石詔亮假鎮南將軍齊王蕭寶
夤鎮東將軍章武王融安南將軍並使持節都督諸軍
事以討之靈太后勞遣亮等賜戎服雜物亮至硤石祖

悅出城逆戰大破之賊復於城外置二柵欲拒官軍亮
焚擊破之殺三千餘人亮與李崇為水陸之期日日進
攻而崇不至及李平至乃進軍共平破石

崔孝芬為龍驤將軍時荊州刺史李神儁為梁遣將攻
圍詔加孝芬通直散騎常侍以將軍為荊州刺史兼尚
書南道行臺領軍司率諸將以援神儁因代焉於時州
郡內戍悉已陷沒且路縣三鷓賊已先據孝芬所統既
少不得徑進遂從弘農堰渠山道南入遣弟孝直輕兵

在前出賊不意賊便奔散人還安堵孝明嘉勞之并賚馬及綿絹等物孝昌三年梁將成景雋率衆逼彭城除孝芬寧朔將軍率大都督李叔仁柴集等赴戰景雋等力屈退走永安二年莊帝聞元顥有內侵之計勅孝芬南赴徐州顥遂潛師向考城擒大都督濟陽王暉業乘勝徑進遣其後軍都督侯暄守梁國城以為後援孝芬勒諸將馳往圍暄恐顥遣援乃急攻之晝夜不息五日暄遂突出擒斬之俘其卒三千餘人

源子雍為夏州刺史會破落汗拔陵首為反亂北海王
顥為大行臺子雍具陳賊可滅之狀顥給予雍兵馬令
其先行時東夏合境反叛所在屯結子雍轉鬪而前九
旬之中凡數十戰乃平東夏徵稅租粟運於統萬城於是
二夏漸寧及蕭寶當等為賊所敗賊帥宿勤明達遣息
阿非率衆邀路華州白水被圍逼關右騷擾咫尺不通
時子雍新平黑城遂率士馬并夏州慕義之民攜家席
卷鼓行南出賊帥康維摩擁率羌胡守鋸谷斷甃棠橋

子雍與交戰大破之生擒維摩又攻賊帥契官斤於楊氏堡破之子雍出自西夏漸至於東轉戰千里至是朝廷始得其委問加散騎常侍使持節假撫軍將軍都督兼行臺尚書復破賊帥紇單步胡提於曲沃堡孝明璽書勞勉之子雍在白水郡復破阿非軍斬獲詔遣侍中尚書令城陽王徽於潼關宣旨慰勞

李苗為西北道行臺與大都督宗正珍孫討汾絳蜀賊平之還除司徒司馬

崔延伯為征西將軍時莫折念生兄天生下隴東寇征西將軍元志為天生所擒賊衆甚盛進屯黑水詔延伯為使持節征西將軍西道都督與行臺蕭寶夤討之寶夤與延伯結壘馬鬼南北相去百餘步寶夤日集督將論討賊方畧延伯每云賊新制勝難與爭鋒寶夤正色責之曰君荷國寵靈總戎出討便是安危所繫每云賊不可討以示怯懦損威挫氣乃君之罪延伯明晨詣寶夤自謝仍云今當仰為明公參賊勇怯延伯選精兵數千下

渡黑水列陣西進以向賊營寶寅率衆於水東尋原西北以示後繼於時賊衆大盛水西一里營營連接延伯徑至賊壘揚威脇之徐而還退賊以延伯衆少開營競追衆過十倍臨水逼蹙寶寅親觀之懼有虧損延伯不與戰身自殿後抽衆東渡轉運如神須臾濟盡徐乃自渡賊徒奪氣相率還營寶寅大悅謂官屬曰崔公古之關張也今年何患不制賊延伯馳見寶寅曰此賊非老奴敵公但坐看後日延伯勒衆而出寶寅為後拒天生悉

衆來戰延伯申令將士身先士卒陷其前鋒於是勇銳
競進大破之俘斬十萬餘追奔及於小隴秦賊勁強諸
將所憚朝廷初議遣將咸云非延伯無以定之果能尅
敵授右衛將軍

常景為左將軍徐州刺史杜洛周反於燕州乃以景兼
尚書為行臺與幽州都督平北將軍元譚以禦之景表
求勒幽州諸縣悉入古城山路有通賊之處權發兵夫
隨宜置戍以為防遏又以頃來差兵不盡強壯今之三

長皆是豪門多丁為之今求權發為兵帝皆從之進號
平北將軍別勅譚西至軍都關北從盧龍塞據此二嶮
以杜賊出入之路又詔景山中險路之處悉令捍塞景
遣府錄事參軍裴智成發范陽三長之兵以守白
巖都督元譚據居庸下口俄而安州石離冗城斛鹽三
戍兵反結洛周有衆二萬餘自松岍赴賊譚勅別將崔
仲哲等截軍都關以待之仲哲戰沒洛周又自外應之
腹背受敵譚遂大敗諸軍夜散詔以景所部別將李琚

為都督代譚征下口降景為後將軍解州任仍詔景為
幽安玄等州行臺賊既南出鈔掠薊城景命統軍梁仲
禮率兵士邀擊破之獲賊將禦夷鎮軍主孫念恒都督
李琚為賊所攻薊城之北軍敗而死率屬城人禦之賊
不敢逼洛周還據上谷投景平北將軍光祿大夫行臺
如故洛周遣其都督王曹紇真馬叱斤等率衆薊南以
掠人穀乃遇連雨賊衆疲勞景與都督于榮刺史王延
年置兵粟國邀其走路大敗之斬曹紇真洛周率衆南

趣范陽景與延年及榮復破之又遣別將重破之於州

西虎眼泉禽斬及溺死者甚衆

一云景破杜洛周斬其武川王賀拔文興

別帥侯莫陳升生擒男女四百口牛馬五千餘頭

楊昱為東南道都督時泰山太守羊侃據郡南叛梁遣將軍王辯率衆侵寇徐州番郡人續靈珍受梁平北將軍番郡刺史擁衆一萬攻逼番城昱遣別將劉馘擊破之臨陣斬靈珍首王辯退走

李暉為中散大夫正光二年南荊州刺史桓叔興驅掠

城民叛入于梁梁資以兵糧令築谷陂城以立洛州逼
上山戍詔暉持節兼尚書左丞為行臺督諸軍討叔興
大破之乘勝拔谷陂叔興退走軍還除尚書左丞

源子恭為冠軍將軍正光中秦益氏反詔子恭持節為
都督河間王琛軍司以討之事平仍行南秦州事後加
後將軍平絳蜀反丹谷清廉二路險澀不通以子恭為
當郡別將俄而建興蜀復反相與連勢進子恭為持節
散騎常侍假平北將軍征建興都督仍兼尚書行臺與

正平都督長孫稚合勢進討大破之正平賊帥范明遠
與賊帥劉牙奴並面縛請降武泰初郢州刺史元願達
以城降梁詔徵都督尉慶賓還京師回衆隸于恭以討
之梁將夏侯夔率衆數萬來寇遠近不安夔乘勢分兵
遂逼新蔡自攻毛城子恭隨方應援賊並破走梁豫州
刺史夏侯亶復遣四將率衆三萬入圍南頓北攻陳項
子恭遣軍禦之賊復奔退梁直閣將軍軍主胡智達等
八將與其監軍閻次洪入寇屯於州城東北四十餘里

子恭擊破之斬智達生擒次洪板橋蠻文石活石忌麤
受梁印節扇誘黨類據險寇竊子恭躬率將士徑襲
其柵數日之中殲殪畧盡後叛蠻雷亂清受梁充
州刺史章綬入為寇掠諸蠻從之置立郡縣子恭討平
之

蕭寶夤為鎮東將軍都督東南揚徐兗三州諸軍事賊
將姜慶真內侵圍逼壽春遂據外郭寶夤躬貫甲胄率
衆力戰破走之後為車騎大將軍都督徐州東道諸軍

事正光末梁遣其將裴邃虞鴻等率衆寇揚州詔寶夤
率諸將討之既而揚州刺史長孫稚大破邃軍斬鴻賊
遂奔退初秦州城人薛珍劉慶杜遷等反執刺史李彥
推莫折大提為首自稱秦王大提尋死其第四子念生
竊號改年置立官寮遣其弟天生率衆出隴東攻沒汧
城陷岐州執元志裴芬之等遂寇雍州屯於黑水朝廷
甚憂之乃除寶夤開府西道行臺所部西征寶夤與大
都督崔延伯擊天生大破之斬獲十餘萬仍進討高平

賊帥万俟醜奴於安定更有負捷時有天水人吕伯度兄弟始共念生同逆後與兄衆保于顯親聚衆討念生戰敗降於胡琛琛以伯度為大都督秦王資其士馬還征秦州大敗念生將杜粲於成紀又破其金城王莫折普賢於永洛城遂至顯親念生率衆身自拒戰又大奔敗伯度乃背胡琛襲琛將劉拔破走之遣其兄子忻和率騎東引國軍念生事迫乃詐降於寶畜朝廷喜伯度立義之功授撫軍將軍涇州刺史平秦郡開國公食邑

三千戶孝昌二年除寶黃侍中驃騎大將軍寶黃初自黑水
終至平涼與賊相對數年攻擊賊亦憚之關中保全寶
黃之力矣

裴衍為征虜將軍孝昌初梁將曹景宗寇荊州山蠻應
之大路斷絕都督崔暹率數萬之衆盤桓魯陽不能前
討荊州危急朝廷憂之詔衍為別將假前將軍與弘農
太守王罷率軍一萬出武關以救荊州賊逆戰於折楊
行大破之賊遂退走荊州圍解

費穆為平南將軍孝昌中妖賊李洪於陽城起逆連結蠻左詔穆兼武衛將軍率眾討擊破於關口之南遷金紫光祿大夫武衛將軍

李神軌為武衛將軍相州刺史安樂王鑿據州反詔神軌與都督源子邕等討平之武泰初蠻帥李洪扇動諸落伊闕已東于鞏縣多被燒劫詔神軌為都督與寧朔將軍崔孝暉持節討平之

爾朱榮為游擊將軍蠕蠕主阿那瓌寇掠北鄙詔假榮

節冠軍將軍別將隸都督李崇北征榮率其所部四千人追擊度磧不及而還秀容內附胡民乞扶莫于破郡殺太守南秀容牧子萬子乞真反叛殺太僕卿陸延并州牧子素和婆論儉作逆榮並前後討平之遷直閭將軍冠軍將軍仍別將內附叛胡乞步落堅胡劉阿如等作亂瓜肆勅勒北列步若反於沃陽榮並滅之以功封安平縣開國侯食邑一千戶尋加通直散騎常侍勅勒斛律洛陽作逆桑乾西與費也頭牧子迭相犄角榮率

騎破雒陽於深井逐牧子於河西孝莊建義初北海王
顥南奔于梁時邢杲寇亂三齊與顥應接顥都督宗正
珍孫河內太守元襲固守不降榮攻而尅之斬珍孫元
襲以徇帝幸河內城榮與顥相持於河上顥令都督安
豐王延明緣河據守榮既未有舟舩不得即渡議欲還
北更圖後舉黃門郎楊侃高道穆等並謂大軍若還失
天下之望固執以為不可屬會馬渚諸楊云有小船數
艘求為鄉導榮乃令都督爾朱兆等率精騎夜濟登岸

奮擊顥子領軍將軍冠受率馬步五千拒戰兆大破之
臨陣擒冠受延明聞冠受見擒遂自逃散顥便率麾下
南奔後遷天柱大將軍還晉陽先是葛榮枝黨韓婁仍
據幽平二州榮遣都督侯淵討斬之時賊帥万俟醜奴
蕭寶夤擁衆幽涇克執日盛榮遣其從子天光為雍州
刺史率都督賀拔岳侯莫陳悅等總衆入關討之天光
既至雍州以衆少不敵逡巡未進榮大怒遣其騎兵參
軍劉貴馳驛詣軍加天光杖罰天光等大懼乃進討連

破之擒醜奴寶黃並檻車送闕門天光又擒王慶雲万俟道樂關西悉平於是天下大難便以盡矣

賈顯度孝莊時為統軍將軍從上黨王天穆破邢杲元顥入洛仍與天穆渡河赴行宮於河內顥平以本將軍除廣州刺史

樊子鵠為平北將軍元顥入洛薛修義及降蜀陳雙熾等受顥處分率眾攻晉州子鵠出與戰大破之又破修義於土門以功拜撫軍將軍後兼右僕射為行臺督賈

智等討呂文欣於東徐州平之出帝太昌初兼尚書左僕射東南道大行臺總大都督杜德等追討爾朱仲遠仲遠奔梁收其兵馬甲仗時梁遣元樹入寇陷譙城詔子鵠與德討之樹屯兵梁國欲來逆戰見子鵠軍盛夜退還譙子鵠引兵追躡樹又背城為陣子鵠勒兵直趨城下縱騎衝突樹衆大敗奔入城門城閉隘塞多自殺害於是斬千餘級獲馬數百匹大收鎧仗遂圍城

鹿念為給事黃門郎及東徐城民呂文欣殺刺史元大

賓南引賊衆屯柵曲術詔愆使持節散騎嘗侍安東將軍為六州大使與行臺樊子鵠討破文欣之黨重以購之文欣同逆人韓端正斬文欣送首魁帥同死者十二人詔書褒慰

侯淵為驃騎將軍前廢帝立幽州刺史劉靈助舉義兵屯於安國城淵與叱列延慶等破擒之

崔孝直後廢帝時為寧遠將軍汝南王開府掾領直寢兄孝芬除荊州詔孝直假征虜將軍別將總羽林二千

騎與孝芬俱行孝直潛師徑進賊遂破走孝芬入城後
梁將曹義宗仍在馬圈鼓動順陽蠻夷緣邊寇竊孝直
率衆禦之賊皆退散

東魏鄭模為安東將軍万俟醜奴遣將郝虎南侵模攻
破其營擒虎以功封槐里縣開國伯邑五百戶

鄭尚為統軍東西征討以軍功賜爵汝陽男

高元盛為衛將軍天平四年滎陽人張儉等聚衆反於
大魏山通西魏元盛討破之

賀拔仁為大都督天平四年十二月河間人邢磨納范陽人盧仲禮等各聚眾反元象元年九月拔仁擊破平之

北齊慕容儼初仕魏正光中為河間王元琛左廂軍主率眾救壽春以戰功賞帛五十匹軍次西硤石因解渦陽之圍平倉陵城荆山戍梁遣將鄭僧等要戰儼擊之斬其將蕭喬梁人奔遁又襲破王神念等軍擒二百餘人神念僅以身免三年梁遣將攻東豫州詔遣大都督

元寶掌討之儼督別將鄭海珍與戰斬其軍主朱僧珍軍
副秦太又擊賊王苟於陽夏平之孝昌中爾朱榮入洛
授儼京畿南面都督永安中又破梁將馬元達蔡天起
柳伯嘉等累有功除強弩將軍與梁將王玄真董當門
等戰並破之解穰城圍尅復南陽新鄉轉積射將軍持
節豫州防城大都督高祖時為鎮南將軍鎮河橋五城
侯景叛儼擊陳郡賊獲景麾下庫狄曷賴及偽署太守
鄭道合兗州刺史王彥夏行臺狄暢等擒斬百餘級旋

軍項城又擒景偽署刺史辛光及蔡遵并其部下二千人除譙州刺史屢有戰功多所降下

高市貴初仕後魏孝昌初恒州內部勅勒劉胡崦等聚衆反市貴為都督率衆討崦一戰破之累遷撫軍將軍諫議大夫及爾朱榮立莊帝市貴預翼戴之勲遷衛將軍光祿大夫秀容大都督第一領民酋長賜爵上雒縣伯爾朱榮擊葛榮於滏口以市貴為前鋒都督葛榮平除使持節汾州刺史後遷驃騎大將軍高祖起義市貴

預其謀及樊子鵠據州反隨大都督婁昭討之子鵠平
除西兗州刺史高祖以洪峒要險遣市貴鎮之高祖沙
苑失利晉州行事封祖業棄城而遁州民柴覽聚衆作
逆高祖命市貴討之覽奔柴壁市貴破斬之是時東雍
南汾二州境多羣聚為盜因市貴平覽皆散歸復業後
秀容人五千戶叛應山胡復以市貴為行臺統諸軍討
平之

叱列平代郡西部人世襲第一領軍酋長魏孝昌末拔

陵反叛如茹餘衆入寇馬邑平以統軍屬有戰功補別將後牧子作亂劉胡崦斛律可那律俱時構逆以平為都督討定胡崦等魏孝莊初除武衛將軍隨爾朱榮破葛榮平元顥遷中軍都督右衛將軍封瘳陶縣伯邑七百戶榮死平與榮妻及爾朱世隆等北走長廣王暉立授右衛將軍加京畿大都督

李渾仕後魏為散騎常侍普泰中崔社客反於海岱攻圍青州詔渾為征東將軍都官尚書行臺赴援而社客

宿將多謀諸城各自保固堅壁清野議有異同渾曰社
客賊之根本圍城復踰晦朔烏合之衆易可分離若簡練
驍勇銜枚夜襲徑趨營下出其不意咄嗟之間便可擒
殄如社客就擒則諸郡可傳檄而定何意冒熱攻城疲
損軍士諸將遲疑渾乃決行未明達城下賊徒驚散生
擒社客斬首送洛海隅清定

斛律羌舉仕魏為大都督潁川人張儉聚衆反叛西逼
關右羌舉隨都督侯景高昂等討平之

薛修義仕魏為關右行臺樊子鵠之據兗州修義從大
司馬婁昭破平之後為衛尉卿山胡侵亂晉州遣修義
追討破之

王琳初仕梁為建寧縣侯侯景遣將宋子仙據郢州琳
攻尅之擒子仙又隨王僧辯破景後拜湘州刺史平景
之勲與杜龕俱為第一以罪下吏復除湘州刺史陳霸先
既殺王僧辯推立敬帝以侍中司空徵琳不從命乃大營
樓艦將圖義舉琳將帥各乘一艦每行戰艦以千數以野

猪為名陳武帝遣將侯安都周文育等誅琳乃受梁禪
安都嘆曰我其敗乎師無名矣逆戰於沌口琳乘平肩
輿執鉞而麾之擒安都文育其餘無所漏唯以周鐵虎
一人背恩斬之鏢安都文育寘琳所坐艦中令一閹豎
監守之

堯雄初仕魏為宣威將軍從叱列延討劉靈助平之拜
鎮東將軍燕州刺史及高祖義旗初建以為車騎大將
軍瀛州刺史武帝入關雄為大都督隨高昂破賀拔勝

於穰城周旋征討三荆仍除二豫揚郢四州都督豫州
刺史及梁以元慶和為魏王侵擾南境雄率衆討之大
破慶和於南頓尋與行臺侯景破梁楚二州民上書更
乞雄為刺史復行豫州事隨行臺任延敬討賀若徽于
潁川延敬等失利雄收集散卒保大梁州文帝因延敬
之敗遣右丞韋孝寬等攻豫州雄都督郭丞伯程多寶
等舉豫州降敵雄外兵參軍王恒伽等從大梁邀斬多
寶西魏以丞伯為潁川太守雄仍與行臺侯景討之雄

別攻破樂口擒丞伯進討懸瓠逐西魏刺史趙繼宗韋孝寬等復以雄行豫州事

任延敬初仕西魏為徐州刺史潁川長史賀若徽執刺史田迅據城降魏復令延敬率豫州刺史堯雄等討之魏遣其將怡峯率衆來援延敬等與戰失利收還北豫仍與行臺侯景司徒高昂等相會共攻潁川拔之

斛律金初仕東魏為汾州大都督從高祖破紇豆陵於河西元象中與行臺薛修義共圍喬山之寇俄而高祖

至仍共討平之因從高祖攻下南絳邵郡等數城武定
初北豫州刺史高仲密據城西叛周文帝入寇洛陽高
祖使金統劉豐步大汗薩等步騎數萬守河陽城以拒
之高祖到仍從破密軍還除大司馬改封石城郡公邑
一千戶轉第一領民酋長三年高祖出軍襲山胡分為
二道以金為南道軍司繇黃櫨嶺出高祖自出北道度
赤嶺會金於烏突戍合擊破之軍還出為冀州刺史
四年詔金率衆從烏蘇道會高祖於晉州仍從攻玉壁

軍還高祖使金總督大衆從歸晉陽後為肆州刺史高祖詔金率衆會攻潁川事平復使金率軍從崞坂送米宜陽西魏九曲戍將馬紹隆據險要關金破之以功別封安平縣男後遷太師文宣天保中茹茹為突厥所破種落分散慮其犯塞驚擾邊民乃詔金率騎三萬屯白道以備之而虜帥豆婆吐久備將三千餘戶密欲西過候騎還告金勒所部追擊盡俘其衆茹茹但鉢將舉國西徙金獲其候騎送之并表陳虜可擊取之勢顯祖於

是率衆與金共討之於吐賴獲二萬餘戶而還進位右丞相

李愍東魏時為南荊州大都督時梁遣南司州刺史任思祖隨郡太守桓和等率馬步三萬魚發邊蠻圍逼下洗戍愍躬自討擊之詔加車騎將軍

慕容紹宗魏末從爾朱榮以軍功封索盧縣侯後從高祖破羊侃又與元天穆平邢杲累遷并州刺史後為豫州刺史西魏將獨孤如願據洛州梁頴之間寇盜蜂起高

祖命紹宗率兵赴武牢與行臺劉貴等平之進爵為公
還朝遷御史中尉屬梁人劉烏黑入寇徐方令紹宗率
兵討擊之大破因除徐州刺史烏黑收其散衆復為侵
竊紹宗密誘其徒黨數月間遂執烏黑殺之侯景反叛
命紹宗為東南道行臺加開府轉封燕郡公與韓軌等
詣瑕邱以圖進取梁武帝遣其兄子貞陽侯淵明等率
衆十萬頓軍寒山與侯景犄角壅泗水灌彭城仍詔紹
宗為行臺節度三徐二兗州軍事與大都督高岳等出討

大破之擒淵明及其將帥等俘獲甚衆乃回軍討侯景于
渦陽于時景軍甚衆前後諸將往者莫不為其所輕及
聞紹宗與岳將至深有懼色謂其屬曰岳所部兵精紹
宗舊將宜共慎之於是與景接戰諸將持疑無肯先者
紹宗麾兵徑進諸將從之因而大捷景遂奔遁軍還別
封永樂縣子

范舍樂初從爾朱兆為都督高祖義舉棄兆歸信都從高
祖破兆於廣阿韓陵並有功賜爵平舒男每從征役多

有克捷除相府左廂大都督

敬顯雋初為高祖別駕及義舉以雋為行臺倉部郎中
從攻鄴令顯雋督造土山城拔又從平西胡轉都官
尚書與諸將征討累有功又從高祖平寇難破周文帝
敗侯景平壽春定淮南又畧地三江口多築城戍累除充
州刺史

段韶為高祖親信都督從帝出晉陽追爾朱兆於赤碕
嶺平之以軍功封下洛縣男後遷武衛將軍周宇文護

母閻氏先配中山宮護聞閻尚存乃因邊境移書請還其母并通隣好文襄許之護得其母乃遣將尉遲迴等襲雒陽韶與蘭陵王長恭大將軍斛律光率衆擊之韶旦將帳下二百騎與諸軍共登卽阪聊觀周軍形勢至太和谷便值周軍即遣馳告諸營追集兵馬仍與諸軍結陣以待韶為左軍蘭陵王為中軍斛律光為右軍與周人相對韶遙謂周人曰汝宇文護幸得其母不能懷恩報德今日之來竟何意也周人曰天遣我來有何可問韶

曰天道賞善罰惡當遣汝送死來耳周軍乃以步人在前上山逆戰韶以彼徒我騎且却且引待其力敵乃下馬擊之短兵始交周人大潰其中軍所當者亦一時瓦解投墜溪谷而死者甚衆雒城之圍亦即奔遁盡棄營幕從印山至穀水三十里中軍資器物彌滿川澤車駕幸雒陽親勞將士於河陰置酒高會策勲命賞除太宰封靈武縣公天保中梁將東方白額潛至宿豫招誘邊民殺害長吏淮泗擾動詔徵韶討之既至會梁將嚴超

達等軍逼涇州又陳武帝率衆將攻廣陵刺史王敬寶遣使告急復有尹令思率衆萬餘人謀襲盱眙三軍咸懼韶謂諸將曰自梁氏喪亂國無定主人懷去就强者從之霸先等智小謀大政令未一外託同德而內有離心諸君不足憂吾揣之熟矣乃留儀同敬顯雋堯雄等圍守宿豫自將步騎數千人倍道赴涇州塗出盱眙令思不虞大軍卒至望旗奔北進與超達合戰大破之盡獲其舟艦器械謂諸軍士曰吳人輕躁本無大謀今破

超達霸先必走即回赴廣陵陳武帝果遁去追至揚子
柵望揚州城乃還大獲其軍資器物旋師宿豫六月韶
遣辯士喻白額禍福白額於是開門請盟韶與行臺辛
術等議且為受盟盟訖度白額終不為用因執而斬之
并其諸弟等並傳首京師江淮帖然民皆安輯顯祖嘉
其功詔賞吳口七十人封平原郡王

蔡儁初仕魏從高祖為都督隨領軍婁昭攻樊子鵠於
兗州又與行臺元子思討元慶和俱平之侯深反復以

儁為大都督率衆討之深敗走

庫狄回鹘為高祖右廂都督從征山胡先鋒斬級除朔州刺史破周文於河陽轉授夏州刺史邛山之役力戰有功增邑通前七百戶

王則為征南將軍從行臺侯景周旋征討屢有功績

暴顯東魏時為征南將軍廣州刺史武定二年侯景反於河南為景所攻顯率左右百餘騎突出賊營拔河南歸國時高岳慕容紹宗等即配顯士馬隨岳等破景於

馮陽三年與清河王高岳襲歷陽取之為贓貨解鄭州
大理禁止處斷未訖為合肥被圍遣與步汗薩慕容儼
等同攻梁北徐州擒刺史王疆與梁秦州刺史嚴超達戰
於涇城破之五年授儀同三司又與高岳臨漢水攻下梁
西楚州獲刺史許法光

薛震為廣州刺史從慕容紹宗討侯景以功別封膚施
縣男文宣天保四年從討山胡破茹茹並有功績累遷
譙州刺史

杜弼文襄時為中軍大將軍破蕭明於塞山別與領軍
潘樂攻拔梁潼州仍與樂等撫軍恤民合境傾賴

斛律平為肆州刺史周太祖遣其右將軍李小光據梁
州平以偏師討擒之出為燕州刺史入兼左衛將軍領
衆一萬討北徐賊破之

慕容猛文宣天保元年為都督東秦州刺史隨斛律敦
比征茹茹敦令猛輕將百騎深入覘候還至白道與軍
相會因此追躡遂大破之賚帛三百段皇建初為左右

大將軍從孝昭討奚賊大捷獲馬二千疋牛羊三萬頭
盧潛天保中為南討經畧陳秦譙二州刺史王奉國合
州刺史周令珍前後入寇潛輒破平之以功加散騎常
侍

斛律光為左衛將軍天保中從征出塞光先驅破敵多
斬首虜并獲雜畜還除晉州刺史後遷衛將軍河清三
年周將達奚成興等來寇平陽詔光率步騎三萬禦之
興等聞而退走光逐北遂入其境獲三千餘口而還遷

司徒左衛將軍其年周遣柱國大司馬尉遲迥齊國公宇文憲柱國庸國公叱雄等衆稱十萬寇雒陽光率騎五萬馳往赴擊戰於邙山迥等大敗光親射雄殺之斬捕首虜三千餘級迥憲僅而獲免盡收其甲兵輜重仍以死者積為京觀世祖幸雒陽策勲班賞遷太尉又封冠軍縣公後主天統三年十二月周遣將圍雒陽壅絕糧道武平元年正月詔光率步騎三萬討之軍次定隴周將張掖公宇文桀中州刺史梁士彥開府司水大

夫梁景興等又屯鹿盧交道光擐甲執銳身先士卒鋒
刃纒交桀衆大潰斬首三千餘級直到宜陽與周齊國
公宇文憲申國公揄跋顯敬相對十旬光置築統關豐
化二城以通宜陽之路軍還行次安鄴憲等衆號五萬
乃躡軍後光縱騎擊之憲衆大潰虜其開府宇文英都
督越勤世良韓延等又斬首三百餘級憲仍令桀及其
大將軍中部公梁雒都與景興士彥等步騎三萬於鹿
盧交塞斷要路光與韓貴孫呼延族王顯等合擊大破

之斬景興獲馬千疋詔加右丞相并州刺史

冊府元龜卷三百五十四

欽定四庫全書

冊府元龜卷三百五十五 宋 王欽若等 撰

將帥部

立功第八

後周蘇椿魏孝明正光中應募討闕右賊授盪寇將軍
累功遷奉朝請鴈威將軍後領鄉兵破槃頭氏有功除
散騎常侍加大都督

常安成魏正光末茹茹寇邊以統軍從鎮將慕容勝與

戰大破之時破六汗枝陵作亂欲逼安成不從乃率所部討陵以功授伏波將軍給鼓節

梁臺魏孝昌中從爾朱天光平闕隴一歲之中大小二十餘戰以功授都督

竇熾魏孝莊永安初從爾朱榮於并州時葛榮別帥韓婁郝長衆數萬人據薊城不下以熾為都督從驃騎將軍侯深討之熾手斬婁以功拜揚烈將軍三年除散騎侍郎西魏孝武即位率兵隨東南道行臺樊子鵠追爾

朱仲遠仲遠奔梁時又遣元樹入寇攻陷譙城遂據之
子鵠令熾率騎兵擊破之封行唐縣子後遷撫軍將軍朱
衣直閣遂從帝西遷仍與其兄善重至城下與武衛將
軍高金龍戰於千秋門敗之因入宮城取御馬四十四
并鞍勒進之行在所帝大悅賜熾及善駿馬各二匹駕
馬各十四大統三年遷車騎將軍高仲密以北豫州來
附熾率兵從太祖援之至雒陽會東魏人據卬山為陣
太祖命留輜重於瀝曲率輕騎奮擊中軍與右軍大破

之悉虜其步卒熾獨追至石濟而還十三年進驃騎大將軍恭帝元年進爵廣武郡公屬茹茹寇廣武熾率兵與柱國趙貴分路討之茹茹聞軍至引退熾渡河至麴伏川追及與戰大破之斬其酋帥郁久間是發獲生口數千及雜畜數萬頭

元定為征虜將軍魏永安初從爾朱天光討闕隴羣賊並破之除襄虜將軍及賀拔岳被害定從太祖討侯莫陳悅以功拜平遠將軍又從擊潼關拔回洛城又從擒

竇泰復弘農破沙苑戰河橋定皆先鋒當其前者無不披靡以前後功累遷都督征東將軍印山之役敵人如堵定奮稍衝之殺傷甚衆太祖親觀之論功為最

王勇魏永安中万俟醜奴等寇亂闕隴勇召募隨軍討之以功授寧朔將軍奉車都尉又數從侯莫陳悅賀拔岳征討功每居多拜別將後遷侍中驃騎大將軍開府儀同三司西魏恭帝元年從柱國趙貴征茹茹破之勇追擊獲雜畜數千頭進爵新陽郡公增邑通前二千戶

仍賜姓庫汗氏

泉企為左將軍浙州刺史魏永安中梁將王玄真入寇
荊州加企持節都督率眾援之遇玄真於順陽與戰大破
之除撫軍將軍假節鎮南將軍東雍州刺史

賀拔岳魏孝莊時為都督副爾朱天光討万俟醜奴于
關中天光以軍事並委於岳遂大破赤水蜀賊軍威大
振時醜奴自率大眾圍岐州遣行臺尉遲菩薩等自武
功南渡渭天光遣岳率騎赴之岳身先士卒擊之退走

岳號令所部賊下馬者皆不聽殺賊顧見之便悉投馬
俄而虜獲三千餘人人馬無遺遂擒菩薩降卒萬餘收
其輜重醜奴尋棄岐州走安定平亭天光自雍至岐與
岳合勢軍於汧渭之間宣言遠近曰今氣候漸熱非征
討之時待至秋涼更圖進取醜奴聞之遂以為實分遣
諸軍散營農於岐州之北百里納川岳天光諸軍盡發
掩之醜奴乃棄平亭而走岳輕騎急追明日及醜奴於
平涼之長坑一戰擒之高平城中又執蕭寶夔以降天

光又與岳度隴餘衆皆降悉坑之死者萬七千人三秦河渭瓜涼鄯州咸來歸歛天光雖為元帥而岳功多進封清水郡公侍中給後部鼓吹

侯莫陳崇初為魏建威將軍隨賀拔岳入關破万俟醜奴崇與輕騎逐北至涇州長坑及之賊未成列崇單騎入賊中於馬上生擒醜奴於是大呼衆悉披靡莫敢當之後騎集遂大破之岳以醜奴所乘馬及寶劍金帶賞之後從太祖擒竇秦復弘農破沙苑戰河橋又別討平

稽胡累戰皆有功進位柱國大將軍

若干惠以中堅將軍從賀拔岳西征定隴右每力戰有功
累遷征西將軍

王盟為賀拔岳前鋒擒万俟醜奴平秦隴嘗先登力戰
拜征西將軍平秦郡守及太祖東征以留後大都督行
雍州刺史事節度關中諸軍趙青雀之亂盟輔魏太子
出頓渭北事平進爵長樂郡公增邑并前二千戶

寇雒從賀拔岳西征擒万俟醜奴於長坑雒每力戰有

功累遷右都督

韓杲為賀拔岳帳內擊万俟醜奴及其枝黨轉戰數十
合並破之後為征虜將軍從太祖復弘農攻拔河南城
獲郡守一人論功為最破沙苑戰河橋並有功授撫軍
將軍

劉亮以都督從賀拔岳西征及岳為侯莫陳悅所害亮
與諸軍謀迎太祖仍從平悅後悅黨幽州刺史孫定兒
據州不下涇秦諸州悉與相應眾至數萬推定兒為主

以拒義師帝令亮襲之定兒以義兵猶遠未為之備亮乃將二十騎先登一燾於近城高嶺即馳入城中定兒方置酒高會卒見亮衆皆駭愕莫知所為亮乃麾兵斬定兒懸首號令賊黨仍遙指城外燾命二騎曰出追大軍賊黨大懼一時降附於是諸州皆歸欵伏文帝置十二軍簡諸將將之亮領一軍每征討與怡峯俱為騎將從擒竇泰復弘農與沙苑之役並力戰有功遷車騎大將軍開府長廣郡公

怡峯以都督從賀拔岳討平隴右破竇泰復弘農破沙苑又與諸軍征討每皆尅捷累遷車騎大將軍開府夏

州刺史

李賢為殿中將軍賀拔岳為侯莫陳悅所害太祖西征賢與其弟遠穆等密應侯莫陳崇以功授都督仍守原州及太祖至秦州悅棄城走太祖令兄子導勒兵追之以賢為前驅轉戰四百餘里至牽屯山及之悅自剄於陣賢亦被重瘡馬中流矢太祖嘉之賞奴婢布帛及雜

畜等授持節撫軍大將軍都督

賀拔勝魏孝武時為驃騎大將軍開府荊州刺史勝攻拔梁下澁戍使人誘勸諸蠻皆率其種落歸欵漢南大駭攻馮翊安定馮陽並下之進位尚書令

李延孫為直閣將軍賀拔勝為荊州刺史表延孫為都督肅清鷓路頗有力焉會東魏遣行臺慕容紹宗等數道來攻延孫獎勵所部出戰遂破之臨陣斬其揚州刺史薛喜族於是義軍更振乃授延孫京南行臺節度河南

諸軍事廣州刺史

獨孤信為魏武衛將軍從孝武入關時荊州雖陷東魏人心猶戀本朝乃以信兼尚書僕射東南道行臺荊州刺史以招懷之信遂大破東魏將田八能辛纂三荆遂定就拜車騎大將軍

王雄為驃騎大將軍率軍從子午谷圍梁上津魏興明年克之

宇文虬為征虜將軍從獨孤信在荊州破梁人於下澧

遂平歐陽鄴城虬俘獲甚多又攻南陽廣平二城擒郡
守一人以功加安西將軍孝武西遷虬為帳內都督破
田八能擒東魏荊州刺史辛纂虬功居多大統三年論
前後功進爵為公擒竇泰復弘農及沙苑河橋之戰皆
有功進車騎將軍從獨孤信討梁企定破之進驃騎大
將軍與王雄征上津魏興等並破之又於白馬與武陵
王蕭紀將楊乾運戰破之尋而魏興復叛虬又與王雄
討平之進位大將軍

段永為平東將軍孝武西遷永時不及從大統初乃結宗人潛謀歸欵密與都督趙業等襲斬西中郎將慕容顯和傳首京師以功別封昌平縣子徐州刺史從擒竇泰復弘農破沙苑並有戰功進爵為公河橋之役永力戰先登投南汾州刺史累遷驃騎大將軍

賀蘭祥為都督常居太祖帳下從平侯莫陳悅又迎西魏孝武以前後功封撫夷縣伯邑五百戶仍從擊潼關獲東魏將薛長孺又攻回洛城拔之還拜左右直長進

爵為公孝閔踐祚遷大司馬明帝武成初吐谷渾侵涼州詔祥與宇文貴討之遂與廣定王鍾留王等戰破之因拔其洮陽洪和二城以其地為洮州撫安西土振旅而還

王子直為太祖行臺郎中漢熾屠各阻兵於南山與隴東屠各共為唇齒太祖令子直率涇州步騎五千討破之南山平除尚書左丞兵部郎中

楊樹為車騎將軍拔東魏邵郡遷為太祖大行臺左

丞齊神武敗於沙苑其將韓軌潘錐可朱渾元等為殿
樹分兵要截殺傷其衆東雍州刺史司馬恭懼樹威聲
棄城遁走樹遂移據東雍州文帝以樹有謀畧堪委邊
任乃表行建州事時建州遠在敵境三百餘里然樹威
恩夙著所經之處並羸糧附之北至建州衆已數萬東
魏刺史車折于洛出兵逆戰樹一鼓敗之又破其行臺
斛律俱步騎二萬於州西大獲甲仗及軍資以給義士
繇是威名大振時東魏以正平為東雍州遣薛榮祖鎮

之樹將謀取之乃先遣奇兵急攻汾橋榮祖果盡出城
中戰士於汾橋拒守其夜樹率騎兵二千從他道濟遂
襲克之進驃騎將軍既而邵郡民以郡東叛郡守郭武
安脫身走免樹又率兵攻而復之轉正平郡守又擊破
東魏南絳郡虜其郡守屈僧珍錄前後功別封邵陽縣
伯邑五百戶邛山之戰樹攻拔栢谷塢因即鎮之及大
軍不利樹亦拔還而東魏將侯景率騎追樹樹與儀同
韋法保同心抗禦且戰且前經十數里景乃引退太祖

嘉之賜帛三百疋復授建州刺史

趙剛為營州刺史時滑州人鄭五醜構逆與叛羌傍乞鐵忽相應令剛往鎮之會鄭五醜已尅定夷鎮所在立柵剛至並攻破之散其黨與五醜於是西奔鐵忽剛又進破鐵忽

郭賢為車騎大將軍鎮魯陽及潁川被圍東魏遣蠻酋魯和扇動羣蠻規斷鴟路和乃遣其從弟興和為廣漢郡守率其部曲侵擾州境賢密簡士馬輕往掩襲大破

之遂擒魯和

陳忻為顯州刺史仍留靜邊時東魏將侯景築九曲城
忻率衆邀之擒其宜陽郡守趙嵩金門郡守樂敬賓後
從李遠平九曲城授帥都督東魏將軍爾朱渾願率精
騎三千來向宜陽忻與諸將輕兵邀之願遂退走累加
車騎大將軍儀同三司散騎常侍與齊將東方老戰於
石泉破之俘獲甚衆時東魏每歲遣兵送米饋宜陽忻
輒與諸軍邀擊之每多克獲

王思政為驃騎將軍荊州刺史東魏將侯景叛擁兵梁鄭為東魏所攻景乃請援乞師當時未即應接思政以為若不因機進取後悔無及即率荊州步騎萬餘從魯關陽翟入守潁川景引兵豫州外稱畧地乃密遣送款於梁思政分布諸軍據景七州十二鎮太祖乃以所授景使持節太傅大將軍兼中書令河南大行臺河南諸軍事廼授思政

泉仲遵為征東將軍東魏北豫州刺史高仲密舉城入

附太祖率軍應之別遣仲遵隨于謹攻柏谷塢仲遵及
戰先登擒其將王顯明柏谷既拔復會戰於邛山後為
車騎大將軍梁荊州刺史柳仲禮每為邊寇太祖令仲
遵率鄉兵從開府楊忠討之梁隨郡守桓和拒守不降
仲遵率先登城遂擒和仍從忠擊仲禮又獲之進驃騎
大將軍

陽雄為積射將軍從于謹攻盤豆柵復從李遠經沙苑
陣並力戰有功加冠軍將軍後入洛陽戰河橋解玉壁

圍迎高仲密援侯景並預有功陳將侯方兒播純陔寇
江陵雄從豆盧寧擊走之

田弘為帥都督太祖復弘農戰沙苑解雒陽圍破河橋
陣弘功居多累加驃騎大將軍平蜀之後梁信州刺史
蕭韶等各據所部未從朝化詔弘討平之又討西平叛
羌及鳳州叛氐等並破之信州羣蠻反又詔弘與賀若
敦等平之保定三年從隨公楊忠伐齊拜大將軍明年
又從忠東伐師還旋鎮吐谷渾寇西邊宕昌羌潛相應

接詔弘討之獲其二十五王拔其七十六柵遂破平之
天和中為仁壽城主以逼宜陽齊將段孝先斛律明月
出軍定隴以為宜陽援弘與陳公純破之遂拔宜陽等
九城以功增邑五百戶進爵柱國大將軍

常善為平東將軍從太祖擒竇泰復弘農破沙苑累有
戰功除使持節衛將軍

豆盧寧以都督從太祖擒竇泰復弘農破沙苑除衛大
將軍兼大都督

權景宣為行臺祠部郎中從太祖拔弘農破沙苑皆先登陷陣後留景宣等守張白塢節度東南義軍東魏將王元凱入洛景宣與延孫等擊走之以功授大行臺右丞進屯宜陽攻襄城拔之獲郡守王洪顯俘斬五百餘人太祖嘉之徵入朝錄前後功封顯親縣男邑三百戶後為車騎大將軍鎮荊州委以鷓南之事初梁岳陽王蕭譽將以襄陽歸朝仍勒兵攻梁元帝於江陵譽叛將杜岸乘虛襲之景宣乃率騎三千助譽破岸譽因是乃

送其妻王氏及子嶽入質景宣又與開府楊忠取梁將
柳仲禮拔安陸隨郡進攻應城拔之獲夏侯珍洽於是
應禮安隨並平朝議以景宣威行南服乃授并安肆郢
新應六州諸軍事并州刺史孝閔徵為江陵防主加大
將軍保定四年晉公護東討景宣別討河南齊豫州刺
史王士良永州刺史蕭世怡並以城降景宣以開府謝
徹守永州開府郭彥守豫州以士良世怡及降卒一千
人歸詣京尋而雒陽不守乃棄二州拔其將士而還至

昌州而羅陽蠻反景宣回軍破之斬首千級獲生口二千雜畜千頭送闕

王軌為大將軍太祖總戎東伐六軍圍晉州刺史崔景嵩守城北面夜中密遣送款詔令軌率衆應之未明士登城鼓譟齊人駭懼因即退走遂克晉州擒其城主特進海昌王尉相貴俘甲士八千人於是遂從平并鄴以功進位上大將軍

趙昶為大都督行南秦州事氏帥蓋闡等反昶討擒之

又與史寧破宕昌羌獠二十餘萬拜武州刺史

裴杲為平東將軍從開府楊忠平隨安陸以功加大都督又從大將軍尉遲迥伐蜀杲率所部為前軍開劔閣破李慶堡降楊乾運皆有功

梁椿為驃騎大將軍從李弼赴潁川援侯景別攻閭韓鎮斬其鎮城徐衛城主卜貴雒率軍士千人降

叱羅協為尉遲迥行軍長史伐蜀既入劔閣迥令行潼州事時有五城郡氏酋趙雄傑等扇動新潼始三州民

反叛聚結二萬餘人在州南三里隔涪水據槐林山置
柵拒守梓潼郡民鄧朏王令公等招誘鄉邑萬餘人復
在州東十里涪水北置柵以應之同逼州城城中糧少
軍人乏食協撫安內外咸無異心遣儀同伊婁訓大都
督司馬裔等將步騎千餘人夜渡涪水擊雄傑一戰破
之令公以雄傑敗亦棄柵走還本郡復與鄧朏等更率
萬餘人於近東南隔水置柵斷絕驛路協遣儀同楊長
樂與司馬裔等率師討之復遣大都督裴孟嘗領百騎

繼進為其聲勢孟嘗既至梓潼值水長不得即渡而王
令公鄧肱見孟嘗騎少乃將三千餘人圍之數重孟嘗
以眾寡不敵各棄馬短兵接戰從辰至午於陣斬令公
及鄧肱等賊徒既失渠帥遂即散走其從黨仍據舊柵
而孟嘗方得渡水與長樂合兵即攻柵經三日賊乃請
降此後數有反叛協輒遣兵討平之

達奚武為驃騎大將軍率兵三萬經畧漢川梁將楊賢
等以武興白馬降梁州刺史蕭循固守南鄭武圍之具

將楊乾運等將兵萬餘救之武逆擊乾運大破之循乃降率所部男女三萬口入朝自劔已北悉平

楊寬為大丞相府司馬朝議欲經畧漢川梁宜豐侯蕭循固守南鄭寬從大將軍達奚武討之梁武陵王蕭紀遣將楊乾運率兵萬餘人救循武令寬督開府王傑賀蘭願德等邀擊之軍至白馬乾運合戰破之俘斬數千人軍還除南幽州刺史

賀若敦為驃騎大將軍時岷蜀初開民情尚梗巴西人

譙淹據南梁與梁西江州刺史王開業共為表裏扇動
羣蠻太祖令敦率軍討之山路艱難人迹罕至敦身先
將士攀木緣崖倍道兼行乘其不意又遣儀同扶猛破
其別帥向鎮侯於白帝淹乃與開業并其黨泉玉成侯
造等率衆七千口累三萬自墊江而下就梁王琳敦邀
擊破之淹復依山立柵南引蠻帥向白彪為援敦設反
間離其黨與其懈怠復破之斬淹盡俘其衆

扶猛為大將軍羅州刺史率所部千人從開府賀若敦

南討信州敦令猛別道直趣白帝所繇之路人迹不通
猛乃梯山捫葛備歷艱阻雪深七尺糧運不繼猛勸獎
士卒兼夜而行遂至白帝刺史向鎮侯列陳拒猛猛與
戰破之乘勝而進入白帝城撫慰民夷莫不悅服武帝
保定中又從田弘破漢南諸蠻前後十餘戰每有功進
位大將軍

李遷哲為驃騎大將軍與田弘同討信州軍次井州刺
史杜滿谷望風送款進圍疊州克之獲刺史冉助國等

遷哲每率驍勇為前鋒所在攻戰無不身先士卒凡下十八州拓地三千餘里時信州為蠻酋向五子王等所圖弘又遣遷哲入據白帝賀若敦等復至遂共追擊五子王等破之及田弘旋軍帝令遷哲留鎮白帝

陸騰為車騎大將軍安康賊黃衆寶等作亂連結漢中衆數萬攻圍東梁州城中糧盡詔騰率軍自子午谷以援之騰乃星言就道至便與戰大破之軍還遷龍州刺史信州蠻蛋據江峽反叛連結二千餘里自稱王侯殺

刺史守令等又詔騰率軍討之騰乃先趨益州進驍勇之士兼具樓船沿外江而下軍至湯口分道奮擊所向摧破乃築京觀以旌武功騰既破信州蠻蛋涪陵郡守蘭休祖又據楚向臨容開信等州地方二千餘里阻兵為亂復詔騰討之初與大戰斬首二千餘級俘獲千餘人當時雖摧其鋒而賊衆既多自夏及秋無日不戰師老糧盡遂停軍集市更思方畧賊見騰不出四面競前騰乃激勵其衆士皆爭奮復攻拔其魚令城大獲糧儲

以充軍實又破銅盤等七柵前後斬獲四千人并船艦
等又築臨州集市二城以鎮遏之後遷江陵總管陳遣
其將章昭達率衆五萬船艦二千圍江陵衛王直聞有
陳寇遣大將軍趙閻李遷哲等率步騎赴之並受騰節
度時遷哲等守外城陳將程文季雷道勤夜來掩襲遷
哲等驚亂不能抗禦騰夜遣開門出甲士奮擊大破之
陳人奔潰道勤中流矢而斃虜獲二百餘人陳人又決
龍川寧邦堤引水灌江陵城騰親率將士戰於西堤破

之斬首數千級陳人乃遁

尉遲迥為伐蜀都督督開府元珍乙弗亞万俟呂陵始叱奴興慕連宇文昇等六軍甲士一萬二千騎萬匹伐蜀以魏廢帝二年春自散關繇固道出白馬趣晉壽開平林舊道前軍臨劔閣蕭紀安州刺史樂廣以州先降紀梁州刺史楊乾運時鎮潼州又降六月迥自潼州大饗將士引之而西紀益州刺史蕭撝不敢戰遂嬰城自守進軍圍之初紀至巴郡聞回來侵遣譙淹迥師為撝

外援迴分遣元珍乙弗亞等以輕騎破之遂降前後戰數十合皆為迴所破搆與紀子宜都王蕭大圓率其文武官屬詣軍門請見迴以禮接之其吏人合營等各令復業唯收僮隸及儲積以賞將士號令嚴肅軍無私馬詔迴為大都督益潼等八州諸軍事益州刺史

任果為沙州刺史率鄉兵二千人從尉遲迴征蜀尋進授驃騎大將軍開府儀同三司蕭紀遣趙跋扈等率衆三萬來援成都果從大軍擊破之及成都平除始州

刺史

于謹為柱國大將軍梁元帝平侯景之後於江陵嗣位
密與齊氏通使將謀侵軼其兄子岳陽王譽時為雍州
刺史以梁元帝殺其兄譽遂結讎隙據襄陽來附仍請
王師乃令謹率衆出討文帝餞於青泥谷謹乃令中山
公護及大將軍楊忠等率精騎先據江津斷其走路梁
人豎木柵於外城廣輪六十里尋而謹至悉衆圍之梁
主屢遣兵出戰為謹所破旬有六日外城遂陷梁主退

保子城翼日率其太子已下面縛降尋殺之虜其男女
十餘萬人收其府庫珍寶得宋渾天儀梁日晷銅表魏
相風烏銅螭螭跌大玉徑四尺圍七尺及諸輦輦以獻
軍無私焉立蕭詧為梁主振旅而旋

蔡祐為中領軍江陵初附諸蠻騷動詔祐與大將軍丘
盧寧討平之

史寧為持節都督涼州諸軍事初茹茹與魏和親後更離叛
尋為突厥所破殺其主阿那瓌部落逃逸者仍奉瓌之子孫

抄掠河右寧率兵邀擊獲瓌子孫二人并其種落酋長自是每戰破之前後獲數萬人進爵安政郡公就拜大將軍時突厥木汗可汗假道涼州將襲吐渾太祖令寧率騎隨之軍至番禾吐渾已覺奔于南山木汗將分兵追之令俱會于青海寧謂木汗曰樹敦賀真二城是吐渾巢穴今若拔其本根餘種自然離散此上策也木汗從之即分為兩軍木汗從北道向賀真寧趨樹敦渾安周國王率衆逆戰寧擊斬之踰山履險遂至樹敦敦是渾之舊都多諸珍藏而渾

主先已奔賀真留其征南王及數千人固守寧進兵攻之偽退渾人果開門逐之因回兵奮擊門未及闔寧兵遂得入生獲其征南王俘虜男女財寶盡歸諸突厥渾賀羅拔王依險為柵周回五十餘里欲塞寧路寧攻其柵破之俘斬萬計獲雜畜數萬頭木汗亦破賀真虜渾主妻子大獲珍物寧軍於青海與木汗會木汗握寧手歎其勇決并遺所乘良馬令寧於帳前乘之木汗親自步送突厥以寧所圍必破皆畏憚之咸曰此中國神智

人也及將班師木汗又遺寧奴婢一百口馬五百匹羊一萬口寧乃還州

魏玄為大都督洛安民雍方雋據郡外叛率步騎一千自號行臺攻破郡國囚執守令玄率弘農九曲孔城伏流四城士馬討平之武帝天和四年轉和州刺史伏流防主五年齊將斛律明月率衆向宜陽兵威甚盛玄率兵禦之每戰輒克

辛威為大將軍武帝保定初率兵討丹州叛胡破之三

年與達奚武攻陽關拔之明年從尉遲迴圍雒陽還拜
小司馬天和初進位柱國復為行軍總管討綏銀等諸
州叛胡并平之六年從齊王憲東伐拔伏龍等五城

劉雄為驃騎大將軍天和中齊人於姚襄築伏龍等五
城以處戍卒雄從齊公憲攻之五城皆拔復遣雄從

柱國李穆出軹關攻邵州等城拔之以功獲賞五千皇
太子西征吐谷渾雄自涼州從滕王道率軍先入渾境
去伏侯城二百餘里道遣雄先至城東舉火與大軍相

應渾洮王率七百餘騎逆戰雄時所部數百人先並分遣斥候在左右者二十許人雄即率與交戰斬首七十餘級雄亦亡其三騎自是從迺連戰之雄功居多賞物甚厚至大軍東討雄從齊王憲拔洪洞下永安軍還仍與憲回援晉州未至齊後主已率大兵親自攻圍晉州垂陷憲遣雄先往察其軍勢雄乃率步騎千人鳴鼓角遙報城中尋而高祖兵至齊主遁走從平并州拜上大將軍

尉遲運為左武伯中大夫軍司馬天和末齊將斛律明月寇汾北運從齊公憲禦之拔其伏龍城進爵廣業郡公增邑八百戶建德元年為右宮正時帝幸雲陽宮又令運以本官兼司武與長孫覽輔皇太子居守俄而衛刺王直作亂率其黨襲齋章門覽懼走行在運時偶在門中直兵奄至不暇命左右乃手自闔門直黨與運爭門斫傷運指僅而得閉直黨不得進乃取宮中材木及牀第等以益火更以膏油灌之火勢轉熾久之直不得進乃

退運率留守兵因其退以擊之直大敗而走是日非運
宮中已不守矣帝嘉之授大將軍賜以直田宅妓樂金
帛車馬及什物等不可勝數

韋孝寬為雍州刺史武帝東伐趙王招率兵出稽胡與
大將軍犄角乃勅孝寬為行軍總管圍守華谷以應接
之孝寬尅其四城武帝平晉州復令孝寬還舊鎮時尉
遲迴叛詔發關中兵以孝寬為元帥東伐軍次河陽迴
所署儀同薛公禮等圍逼懷州孝寬遣兵擊破之進次

懷縣永城橋之東南其城既在要衝雉堞牢固迴已遣兵據之諸將士以此城當路請先攻取孝寬曰城小而固若攻而不拔損我兵威今破其大軍此亦何能為也於是引軍次於武陟大破迴子惇惇輕騎奔鄴軍次於鄴西門豹祠之南迴窮迫自殺兵士在小城中者盡坑於游豫園諸有未服皆隨機討之關東悉平

李澈武帝時從皇太子西征吐谷渾以功賜爵周昌縣男從武帝平齊錄前後功再進爵遷左武衛將軍

杜整為儀同武州刺史從武帝平齊加上儀同進爵平
原縣

冊府元龜卷三百五十五